

# লোকসমাজ

আজ শুক্রবার,  
১৭ ফেব্রুয়ারি, ২০২৩,  
০৪ ফাল্গুন, ১৪২৯, ২৫ রজব, ১৪৪৪,  
রেজিঃ নং-কেএন ৩৬৫, ২৭তম বর্ষ, ১০৯ সংখ্যা,  
০৪ পৃষ্ঠা, মূল্য ০৪ টাকা।

www.loksamaj.com

eloksamaj.com

## গমের রাস্ট প্রতিরোধী জাতের বাংলাদেশের গবেষণার প্রশংসা অস্ট্রেলিয়ান গবেষকদের

আকরামুজ্জামান ॥ গমের রাস্ট প্রতিরোধ জাত আবিষ্কারে বাংলাদেশ গম ও ভুট্টা গবেষণা ইনস্টিটিউটের বিজ্ঞানীরা সফল হয়েছেন। যশোর আঞ্চলিক কৃষি গবেষণা কেন্দ্রের বিস্তীর্ণ মাঠে গত ২০১৬ সাল থেকে চলছে গমের রাস্ট রোগের প্রতিরোধী জাতের এ গবেষণা কার্যক্রম। গতকাল বৃহস্পতিবার বিকেলে গবেষণা কার্যক্রম সরেজমিনে দেখতে আসেন অস্ট্রেলিয়ান হাই কমিশন ও অস্ট্রেলিয়ান সেন্টার ফর ইন্টার ন্যাশনাল এগ্রিকালচারাল রিসার্চ (এসিআইএআর) এর ২০ সদস্য প্রতিনিধি দল। ২০ সদস্যের এ প্রতিনিধি দলের নেতৃত্বে ছিলেন,



অস্ট্রেলিয়ান কমিশনের দলনেতা ফিওনাসিমসন ও অস্ট্রেলিয়ান কমিশনার ফর এগ্রিকালচারাল রিসার্চ এসিআইএআর এর দলনেতা প্রফেসর এড্রু কেম্বেল। বিজ্ঞানীরা জানান, ২০১৬ সালে বাংলাদেশে গমের রাস্ট রোগ দেখা দেয়ার পর থেকে এসিআইএআর ও সিমিটের সহায়তায় বিভার্লিউএমআরআই রাস্ট প্রতিরোধী গমের জাত উদ্ভাবনে গবেষণা করে আসছে। আঞ্চলিক কেন্দ্র, যশোরে একটি আন্তর্জাতিক মানের প্লাটফর্ম স্থাপন করা হয়েছে যেখানে বিভিন্ন দেশের প্রায় চার হাজার গমের জাত প্রতি বছর বাছাই করা হয়।

[পৃষ্ঠা-২ কলাম-১]

## গমের রাস্ট প্রতিরোধী জাতের বাংলাদেশের

বাংলাদেশ গম ও ভুট্টা গবেষণা ইনস্টিটিউট এ পর্যন্ত বারি গম ৩৩ ও বিভার্লিউএমআরআই গম ৩ নামে ২টি রাস্ট প্রতিরোধী জাত উদ্ভাবন করেছে। এর মধ্যে মেহেরপুর জেলায় যেখানে প্রথমরাস্ট রোগ দেখা দিয়েছিল সেখানে গত বছরের তুলনায় ৩০০০ হেক্টর বেশি জমিতে গম আবাদ হয়েছে। এদিকে গতকাল বৃহস্পতিবার অস্ট্রেলিয়ান প্রতিনিধিদল গমের রাস্ট রোগের গবেষণার অগ্রগতি দেখে প্রশংসা করেন। ২০ সদস্যের এ প্রতিনিধি দল বিকেলে যশোর আঞ্চলিক কৃষি গবেষণা কেন্দ্রের মাঠে এসিআইএআর বাংলাদেশ গম ও ভুট্টা গবেষণা ইনস্টিটিউটের পক্ষে প্রকল্পের গবেষণা কার্যক্রম সরেজমিনে দেখে ব্যাপক উৎসাহিত হন। এসময় অস্ট্রেলিয়ান কমিশনার ফর এগ্রিকালচারাল রিসার্চ এসিআইএআর এর দলনেতা প্রফেসর এড্রু কেম্বেল বলেন, গমের জন্য ভয়ঙ্কর রোগ হচ্ছে রাস্ট। সেই রোগ প্রতিরোধী জাত আবিষ্কারে এখানকার বিজ্ঞানীরা যে সফল হয়েছেন তা নিঃসন্দেহে প্রশংসনীয়। এ সফলতা শুধু বাংলাদেশের নয়, সারা পৃথিবীর কৃষির জন্য অনুকরণীয়।

প্রায় একই কথা বলেন অস্ট্রেলিয়ান কমিশনের দলনেতা ফিওনাসিমসন। তিনি বলেন, বাংলাদেশের গমের রাস্ট প্রতিরোধী জাত আবিষ্কারে বিজ্ঞানীদের এ সফলতায় আমরা আশাবাদী। এখানকার বিজ্ঞানীরা গত প্রায় ৭ বছর ধরে বিভিন্ন দেশের গমের জাত এনে এখানে ট্রায়াল দিয়ে রোগ প্রতিরোধী জাতকে বেছে নিচ্ছেন। যার মাধ্যমে গমের রাস্ট রোগের প্রকোপ থেকে চাষিরা নিরাপদে থাকছেন। তিনি বলেন, আমরা আশাবাদী এখানকার গবেষকদের এ সফলতার বিস্তৃতি সারা বিশ্বের অন্যান্য স্থানেও কার্যকর ভূমিকা রাখবে।

এ প্রসঙ্গে গবেষণা প্রকল্পের প্রধান গবেষক ড. মোহাম্মাদ রেজাউল কবীর বলেন, ২০১৬ সালে যশোরাঞ্চলের মেহেরপুর জেলাসহ দক্ষিণ-পশ্চিমাঞ্চলের আটটি জেলায় গমে রাস্ট নামক ভয়ঙ্কর ছত্রাকের আক্রমণ দেখা দেয়। এতে ২০১৮ সাল পর্যন্ত এ অঞ্চলে গম আবাদের মারাত্মক বাধাগ্রস্ত হয়। তবে ২০১৭ সালে বাংলাদেশ কৃষি গবেষণা ইনস্টিটিউট (বারি) বারি গম ৩৩ রাস্ট প্রতিরোধী জাত উদ্ভাবন করে। এর মধ্যে রাস্ট প্রতিরোধে এক নতুন দিগন্ত উন্মোচিত হয়। সেই থেকেই আমাদের গবেষকরা গমের কার্যকর রাস্ট প্রতিরোধী জাত নিয়ে এখানে একাধিক ট্রায়াল দিয়ে গবেষণা করছেন। তিনি বলেন, আমরা দীর্ঘ গবেষণার মাধ্যমে রাস্ট প্রতিরোধী গমের জাত আবিষ্কারে সফল হয়েছি। যা বর্তমান দেশে নয়, বিদেশের কৃষি বিশেষজ্ঞদের কাছেও প্রশংসিত হচ্ছে।

অস্ট্রেলিয়ান প্রতিনিধিরা গবেষণার মাঠ পরিদর্শন শেষে যশোর আঞ্চলিক কৃষি গবেষণা কেন্দ্রের সম্মেলন কক্ষে এ বিষয়ে এক সেমিনারে যোগ দেন।